



## JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

### Summario kazus

Periodo : Marsu 2009

Edisaun: Marsu 2009

### **Julgamentu Kazu Krime Kolektivu iha Tribunal Distrital Suai**

Iha terseiru semana fulan Marsu 2009, tuir orariu ne'ebe iha Tribunal Distrital Suai (TDS) sei halo julgamentu ba kazu kolektivu 4 kompostu husi kazu krime homisidiu 2 no abuzu sexual 2 hasoru vitima minoridade. Ba julgamentu kazu abuzu sexual ida JSMP la monitora tanba kazu taka ba publiku bazea ba artigu 76 Kodigu Prosesu Penal (KPP).

Husi kazu 3 ne'ebe julga no JSMP konsege monitora, kazu tolu seluk sei le desizaun iha loron 30 Marsu no kazu ida fali sei hahu prosesu julgamentu foun iha fulan Junho 2009.

Tuir mai kazu hirak ne'ebe JSMP konsege monitora iha periodu ne'e mak hanesan tuir mai ne'e :

### **Kazu Abuzu Sexual hasoru Labarik Minoridade**

Ba kazu ida ne'e, arguidu komete ona krime abuzu sexual dala rua hasoru vitima labarik minoridade iha tempo ne'ebe la hanesan.

Refere ba akuzasaun husi Ministeriu Publiku (MP), arguidu ne'ebe agora dadauk idade 56 ona, iha tinan 2002 komete krime abuzu sexual hasoru labarik ho idade tinan 3 no surat akuzasaun regista ona iha TDS ho numeru prosesu: 32/PEN/2005/TDS.

Nune'e mos iha tinan 2008, arguidu komete tan krime ne'ebe hanesan hasori labarik ho idade tinan 8. Ba prosesu segundu ne'e tuir orariu ne'ebe iha sei halo julgamentu iha loron 16 Marsu 2009 ho numeru prosesu 123/PEN/2008/TDS.

Hahalok arguidu ne'e, MP akuza arguidu ho artigu 290 (3e) Kodigu Penal kona ba abuzu sexual hasoru labarik ne'ebe tinan seidauk to'o 15.

Iha audiensia julgamentu laran, parte MP no defensores husu ba juiz coletivu ne'ebe lidera julgamentu atu adia prosesu ne'e ho razaun prinsipal katak tuir lolos TDS tenke prosesa uluk lai kazu primeiru to'o iha desizaun depois mak prosesa fali kazu segundu. Iha nia intervensaun presidente juiz coletivu informa katak kazu primeiru seidauk prosesu tanba juiz internasional ne'ebe uluk kaer

kazu ne'e wainhira kontratu remata no fila ba nian rain laiha nota ruma mak indika kona ba progressu kazu primeiru.

Ho razaun hirak iha leten, parte MP no defensores husu ba tribunal Suai atu junta hamutuk kazu rua ne'e ba akuzasaun ida deit hodi prosesu bele lao normal tanba rekoinese katak arguidu komete tipu krime ne'ebe hanesan. Ba kazu segundu, arguidu halao ona prizaun preventiva husi fulan Outubru tinan kotuk, ho nune'e iha loron 16 Marsu arguidu hetan liberdade kondisional husi tribunal hodi hein prosesu kontinuasaun julgamentu.

Julgamentu tuir mai sei halao fila fali iha loron 09 Junho 2009 ho agenda le akuzasaun no rona depoimentus.

### **Kazu Homisidiu**

Iha loron 7 Novembru 2008, iha Maubisse, vitima husi kotuk buti metin arguidu nia kakorok no riba to'o monu ba rai. Wainhira arguidu monu, vitima foti fatuk ho intensaun atu riba ba arguidu maibe ho liman lalais arguidu losu sai tudik husi kalsa bolsu no sona vitima to'o borus ba kotuk. Liu tiha loron ida depois de akontesementu vitima mate iha hospital Maubisse.

Ho hahalok ida ne'e, MP akuza arguidu ho artigu 338 Kodigu Penal kona ba homisidiu.

Iha nia deklarasaun, arguidu deklarata katak husi inisiu nia laiha intensaun ou planu atu oho vitima, maibe tanba vitima buti nia kakorok no riba ba rai entaun arguidu losu sai tudik husi kalsa bolsu no sona vitima.. Sasin sira ne'ebe fo depoimentus iha audiensia laran hateten katak los duni arguidu mak sona vitima iha momentu ne'eba.

Bazea ba faktus iha leten, iha alegasaun final, MP akuza nafatin arguidu ho artigu 338 Kodigu Penal no husu ba juiz kolektivu atu hamonu sentensa tinan 6 prizaun ba arguidu.

Iha parte seluk, defensores sira rejenta total alegasaun husi MP ne'ebe akuza arguidu ho artigu 338 Kodigu Penal ba kazu refere. Defensores sira salenta katak, hare ba faktus akontesementu entaun asaun arguidu konsidera nudar legitima defeza ho nune'e artigu 49 Kodigu Penal mak nudar fundamentu ba alegasaun no desizaun final. Ho razaun katak arguidu laiha intensaun no planu hodi oho vitima maibe nudar legitima defeza tanba vitima rasik mak hahu uluk asaun.

Leitura sentesa ba kazu ne'e sei halao iha loron 30 Marsu 2009.

### **Kazu Homisidiu**

Iha loron 21 de Setembro 2008, arguidu nain rua hanesan AS & VS halo aksaun violensia kontra vitima ida to'o mate. Mumento ne'eba, arguidu AS tebe dala ida ba vitima iha kabun, depois arguidu AS husik fatin akontesimentu ne'e. Mumento arguidu husik hela fatin akontesimentu ne'e, arguidu VS ho distansia mais ou minus 5 metros foti fatuk no tuda vitima iha ulun to'o monu. Depois de akontesimentu ne'e vitima mate kedas tanba fatuk ne'ebe tuda husi arguidu rasik.

Iha leitura de sentensa, Ministerio Publiku alega arguidu nain rua ho artigu 338 Kodigu Penal Indonesia konaba homisidio no artigu 55 Kodigu Penal Indonesia konaba halo aksaun krime. Bazeia artigu rua ne'e Ministerio Publiku husu ba tribunal atu hamonu sentensa tinan 5 ba arguidu VS no tinan 2 ba arguidu AS. Iha parte seluk, defeza sira argumenta katak aksaun husi arguidu AS ne'e samente tebe dala ida deit la priense rekizitus ne'ebe reve iha artigu homisidio. Tanba nea'e arguidu AS bele hetan liberdade husi akuzasaun konaba homisidio ou serteza liu mak hahalok arguidu nian priense deit rekizitus aksaun krime ofensas corporais simples. Ba arguidu VS, defeza sira argumenta katak em prinsipio arguidu la iha intensaun atu oho vitima. Tanba ne'e artigu ne'ebe mak apar liu mak artigu 351.3 Kodigu Penal Indonesia konaba ofensas corporais ne'ebe ninia rezultadu hamate ema.

Julgamentu ba leitura da sentensa sei halo iha loron 30 de Marsu 2009.

### **Kazu Abuzu Sexual ba labarik Minoridade**

JSMP samente hetan deit lisensa atu tuir leitura akuzasaun no depois wainhira hahu tama ba iha provas testemuñas taka ba publiku. Akuzasaun ne'ebe le'e husi juiz kolektivu deklarata katak iha fulan maio 2008, arguidu esforsu aan atu halo aksaun abuzu sexual ba vitima ne'ebe ho idade 11 anos maibe aksaun ne'e la konsegue hotu. Iha mumento ne'eba arguidu hakoak vitima no hatama liman ba vitima nia kalsina ate hetan ejakulasaun. Mumento ne'e arguidu ameasa vitima atu oho wainhira nia hakilar. Ba hahalok ne'e Ministerio Publiku akuza arguidu ho artigu 285 no 74 Kodigu Penal Indonesia.

Atu hetan informasaun kle'an favor kontaktu:

Luis Oliveira Sampaio

Direktor Exekutivu JSMP

Enderesu e-mail: [luis@jsmp.minihub.org](mailto:luis@jsmp.minihub.org)

Landline: 3323883